

Na osnovu člana 26. stav (1) tačka d) Zakona o kontroli vanjskotrgovinskog prometa roba i usluga od strateške važnosti za sigurnost Bosne i Hercegovine ("Službeni glasnik BiH", broj 103/09) i člana 61. stav (2) Zakona o upravi ("Službeni glasnik BiH", br. 32/02 i 102/09), ministar vanjske trgovine i ekonomskih odnosa donio je

UPUTU

O NAČINU I POSTUPKU REGULIRANJA PRIVREMENOG UVOZA, PRIVREMENOG IZVOZA I TRANZITA SPORTSKOG I LOVAČKOG ORUŽJA I MUNICIJE

Član 1. (Predmet Upute)

Ovom Uputom regulira se način i postupak privremenog uvoza, privremenog izvoza i tranzita sportskog i lovačkog oružja i municije (u daljnjem tekstu: privremeni uvoz, izvoz i tranzit) za potrebe učešća na organiziranim treninzima, takmičenjima i bavljenjem lovom.

Član 2. (Definicije)

(1) Pojmovi upotrijebljeni u ovoj Uputi imaju slijedeće značenje:

- a) sportsko oružje je dugo vatreno oružje glatkih cijevi do kalibra 12 mm, užljebljenih cijevi do kalibra 8,61 mm, odnosno 0,338 inča i kratko oružje do kalibra 11,43 mm, odnosno 0,45 inča;
- b) lovačko oružje je lovačka puška kalibra 4-36 (glatka cijev) ili lovački karabin kalibra 6,5-8 mm (užljebljena cijev) koji se koriste radi bavljenja lovom;
- c) malokalibarsko oružje su sve vrste pušaka i pištolja koji koriste municiju kalibra 5,6 mm;
- d) vazdušno oružje su sve vrste pušaka i pištolja koji snagom vazduha pod pritiskom ili drugog plina izbacuje kroz cijev kuglicu (dijabolo) kalibra 4,5 mm;
- e) municija čija je osnovna namjena korištenje za sportsko i lovačko oružje odnosno kalibre i tipove municije navedene u tač. a), b), c), i d) ovog stava;
- f) organizirani treninzi, takmičenje i bavljenje lovom su sportske i druge manifestacije koje se organiziraju u inostranstvu odnosno u Bosni i Hercegovini na koje su, od strane organizatora, pozvani članovi nacionalnih strukovnih sportskih saveza (streljačkog ili skijaško-bijatlonskog), odnosno članovi lovačkih udruženja.

(2) Oružja iz stava (1) tač. a), b), c) i d) ovog člana, ne smiju biti posebno namijenjena za vojnu, odnosno policijsku upotrebu ili tipa potpune automatske paljbe.

Član 3.

(Zahtjev za izdavanje odobrenja)

(1) Odobrenje za privremeni uvoz, privremeni izvoz i tranzit daje carinski službenik, na zahtjev fizičkog ili pravnog lica.

(2) Zahtjev iz stava (1) ovog člana sadrži naročito i to:

- a) ime i prezime lica koje rukuje oružjem;
- b) adresu na koju se oružje otprema ili transportuje;
- c) dokument o identifikaciji sportskog i lovačkog oružja, i to:
 - 1) za sportsko oružje - Lista oružja, opreme za oružje i municiju ovjerena od nacionalnog strukovnog saveza ili streljačkog kluba (serijski broj oružja, proizvođač, kalibar municije, prateću opremu za oružje);
 - 2) za lovačko oružje - Oružni list;
- d) sredstvo transporta;
- e) datum polaska i procijenjeni datum povratka;
- f) poziv organizatora na ime pravnog ili fizičkog lica;
- g) granični prijelaz na koji će ući i izaći.

Član 4.

(Odobrenje zahtjeva)

Privremeni uvoz, privremeni izvoz i tranzit se može odobriti za najviše tri komada sportskog, odnosno lovačkog oružja po licu, s pripadajućom opremom za ta oružja i određenu količinu municije po jednom komadu oružja, zavisno od kalibra oružja, i to:

- a) za sportsko oružje:
 - 1) kugla 12 mm do 500 kom;
 - 2) patrone sa sačmom 12 mm do 500 kom;
 - 3) kugla 5,6 mm do 3.000 kom;

- 4) dijabolo 4,5 mm do 5.000 kom;
- b) za lovačko oružje:
 - 1) patrone 4-36 do 100 kom;
 - 2) metak 6,5-8 mm do 20 kom.

Član 5.
(Dodatne odredbe)

- (1) Sportsko i lovačko oružje i municija moraju biti u ličnom prtljagu lica na koje glasi izdato odobrenje za privremeni uvoz, privremeni izvoz i tranzit.
- (2) Carinski organ obavezan je izvršiti uvid u kompletan popis oružja i municije iz stava (1) ovog člana, kao i izvršiti njihovu provjeru.
- (3) Organizator iz člana 3. stav (2) tačka f) treba izdati potvrdu o broju utrošenih zrna učesnika na učešću na koje su pozvani.

Član 6.
(Prestanak važenja akta)

Danom stupanja na snagu ove Upute prestaje da važi Uputstvo o načinu i postupku reguliranja privremenog uvoza, privremenog izvoza i tranzita sportskog i lovačkog oružja i municije ("Službeni glasnik BiH", broj 56/05).

Član 7.
(Stupanje na snagu)

Ova Uputa stupa na snagu osmog dana od dana objavljivanja u "Službenom glasniku BiH".

Broj 07-1-02-803/10
2. marta 2010. godine
Sarajevo

Ministar
Mladen Zirojević, s. r.
